

Visoki predstavnik zabrinut zbog činjenice da Predsjedništvo BiH nije odobrilo strukturu oružanih snaga do zakonski predviđenog roka

Visoki predstavnik Christian Schwarz-Schilling je zabrinut zbog činjenice da Predsjedništvo BiH nije ispoštovalo zakonski predviđen rok za usvajanje predložene odluke o veličini, strukturi i stacioniranju Oružanih snaga Bosne i Hercegovine (OS BiH).

U Zakonu o odbrani koji je stupio na snagu 28. decembra 2005. godine navodi se rok 1. juli, koji je istekao u petak u ponoć.

“Propuštanjem ovog roka, Predsjedništvo BiH odlaže implementaciju vojnih reformi koje su od suštinskog značaja”, rekao je visoki predstavnik. “Predsjedništvo, u svom svojstvu kolektivnog zapovjednika oružanih snaga, mora ovo pitanje urgentno razmotriti na narednom sastanku”

Naredni sastanak Predsjedništva BiH je sutra.

Predloženu odluku o veličini, strukturi i stacioniranju OS BiH izradili su ministar odbrane BiH Nikola Radovanović i njegov tim za tranziciju, uz savjetodavnu podršku NATO-a.

Upravni odbor Vijeća za implementaciju mira razgovarao je konkretno o ovom pitanju na sastanku koji je održan prošlog mjeseca, izrazivši nadu u kominikeu da “će se do 1. jula donijeti odluka koja će biti u skladu sa zakonom i koja će ispunjavati kriterije jedinstvenih vojnih snaga koje su

kompatibilne sa snagama NATO-a".